

Ekwo-ozì K'èbo, Pòlu Deru Nù Ndu Kòrentu

1 ¹Òwa-a bụ ekwo-ozì, mụbe Pòlu ede; mụbe onye Chileke kuru mee gè mu buru onye-ishi-ozì Kéreshi Jizòsu. Onye mu l'ìya ede ekwo-a bụ nwanna anyi Timoti. Ndu anyi ede iya anụ bụ Chìochi kẹ Chileke lẹ Kòrentu mẹ iphe, bụkpoo ndu-nso, bu l'alì Akaya l'ophu.

²Anyi sù gè Chileke, bụ Nna anyi yèe Nnajiuphu, bụ Jizòsu Kéreshi meeru unu eze-iphe-oma; mekwaapho g'unu buru l'èhu-guu.

Pòlu ekele Chileke

³Unu g'anyi kele onye ono, bụ Chileke bya aburu Nna kẹ Nnajiuphu anyi, bụ Jizòsu Kéreshi. Oo ya bụ Nna ophu aphụ obu-imemini nkiya nyiberu anyibe; bya aburu Chileke, bụ iya bẹ ndumobu l'ophu shikota l'èka. ⁴O bụ iya bụ onye aduje anyi obu l'iphe, bụkpoo iphe-èhuka, anyi ejekpoo ejeje; g'anyi adukwanu ike dya ndu ozo obu m'ephe -nodu eje iphe-èhuka g'o duhabe. Anyi egudekwanu ndumobu ono adu ndu ozo. ⁵L'o kwa g'anyi yi l'iphe-èhuka, nyiberu anyibe, Kéreshi jeru bụ g'anyi yihukwapho lẹ ndumobu, nyiberu anyibe ophu Kéreshi adu anyi. ⁶Su-a; o -buru l'anyi eje iphe-èhuka; unu makwaru l'iphe-èhuka ono, anyi eje bukwa g'ee-shi gè Chileke adu unu obu; teme o bukwarupho g'ee-shi gè Chileke adzo unu. Teke Chileke adukwanu anyi obu; ono aburu iphe, unu e-gude shihu obu ike teke unu a-nodu ata nshi eje egube iphe-èhuka ono, anyi eje ono. ⁷Oobujeru anyi -nyata unu; anyi asu l'anyi maru-a l'unu a-pfushia ike. Noo kele anyi maru l'oo g'unu yi l'iphe-èhuka, anyi eje-a bụ g'unu yihukwapho lẹ ndumobu ophu Kéreshi adu anyi.

⁸Unwunna anyi; iphe, anyi eme g'unu maru bukwa k'iphe-èhuka, anyi jeru lẹ Eshiya. Ewere, meru anyi meghakwaru anyi aka k'ophu o du g'onye e boru ivu, nyi-kworu iya olu. O tsuta-beru anyi l'èhu k'ophu anyi eshiedu rikwadaa l'anyi e-mechaa dzukwaduru ndzu ozo. ⁹Mbu-a; anyi

shi rịa l'e kpewaru anyi mpfugbu; ọle ono tukuru buru iphe, e-me g'anyi ta anọdu ari l'anyi a-dụ ike dzọo onwanyi; mekwaaphọ g'anyi wotachia onwanyi ye Chileke l'eka, bụ iya bụ Chileke l'aduje ike mee g'onye nwuhuru anwuhu shi l'onwu teta dzuru ndzụ. ¹⁰Ọ dzọtaru anyi l'ejo ọgu ono, gege eri anyi ishi ono. Ọ bukwarupho g'ọo-nọduje adzọ anyi bụ ono. Ọo ya bụwaa ẹka ẹnaya anyi dụ l'ọo ya a-dzọta anyi. ¹¹Unubedua kwaphọ; unu yekwarupho anyi ẹka; unu pfuje nuru anyi Chileke. Ọo ya bụ; g'aadụ igwe kele Chileke ekele ẹhu anyi; kele iya k'eze-iphe-oma, o meru anyi; kele ọ nūmaru olu ikpoto ndu epfu anụ iya nū.

Polu agbanwe iphe, ọ tūberu

¹²Obu anyi meru g'o doo anyi ẹnaya rengurengu lẹ ndiphe ta aghachadu umere anyi aghacha; ọphu ntuphu-ire adudu iya; kelekele mę a -bya l'ẹhu anyi l'unu. Umere anyi pfuru nhamunha l'iphe Chileke. Ọ buru iphe ono bę anyi aba aba iya. Ọ tọ bukwa lẹ mmamiphe kę ndiphe bę o shi; ọ kwa eze-iphe-oma, Chileke l'eme. ¹³Liphe, anyi ederu unu bukwa iphe, unu a-dụ ike guta maru iphe, o pfuru. Mu elekwa ẹnaya l'oo-mechaa dogbua unu ẹnaya ree; ¹⁴mbu iphe ono, doru unu ẹnaya ẹka lanu ẹka lanu nta-a ono. Unu maru lẹ mbọku ono, Nnajiuphu anyi, bụ Jizosu a-bya ono bę unu a-huma iphe, a-zọbe gude anyi aba l'abaa; anyibedua egudekwapho unu abakwapho.

¹⁵Ọ kwa l'o doru mu ẹnaya l'unu maru iphe ono; meru g'o gude mu shi sụ lẹ mu a-byaadaa ndu-unu bya emee g'urwu gbaarụ unu k'ugbo ẹbo. ¹⁶Mu eshiwaro elieli jeshia Masedoniya. Mu -shiepho Masedoniya lwaje mę mu abatakwanu ozo byapfuta unu mę unu edua mu ije gę mu jeshia Jiudiya. ¹⁷?Ọ dụ unu gę mu shi agha onwomu aghagha teke ono, mu shi tūbe iya ẹgube ono? ?Tọo unu riru lẹ mu epfuje iphe nkemu gę ndiphe. Lọ kwa ndiphe asuje: Ee l'iphe, uche phe suru: Waawa. ¹⁸Tuswekwa! Ọ kwa gę Chileke l'onwiya bụ onye gbaru g'e gude ire iya ẹka bụ g'iphe, anyi epfu gbaru g'e gude iya ẹka lẹ Ee anyi bụ Ee; Waawa anyi buru Waawa. ¹⁹Lẹ Jizosu Kéreshi ono, bụ Nwa Chileke ono, Sayilasu pfuru unu opfu iya ono; Timoti pfuaru iya unu ono; mbedua l'ishi onwomu pfuaru iya unu ono ta abukwa ẹgube onye asuje Ee l'iphe, uche iya suru Waawaa. Ọ chikwaa iphe, ọ bụ bụ lẹ Kéreshi ono -sūwaa Ee bę ọ bụ Ee. ²⁰Ọo ya bụ lẹ Chileke shi l'ẹhu Kéreshi ono emeębekota iphemiphe, yebe Chileke kweru ukwe iya. Noo g'o gude anyi nọdu eshije iya l'eka sụ "Amenu"; g'ee-shi nno kwabę Chileke ùbvù. ²¹Ọo Chileke meru g'onye l'unu shi l'eka Kéreshi pfuru pfushia ike; teme ọ bukwaru iya pho hotaru anyi. ²²O meru anyi iphe-ohubama, egoshi l'anyi bụ ndu nkiya bya eworu Unme-dụ-Nsọ nkiya ye l'obu anyi gude goshi iphe ono, o kweru anyi ukwe iya l'oo-mechaa meeru anyi ono.

²³Ọo Chileke ono bę bụ ekebe mu. Mbụ; g'o mekwaa mu g'ọ dụ iya ree mę ọ -budu ire-lanu bę mu epfu-a: Iphe, kparu iphe, mu haru abya

Kòrentu buèkwapho gè mu ata abaduru unu mba shii. ²⁴Anyi te emekwa g'anyi tubujeru unu iphe, unu e-kweta; eshinu unu pfi-shiru ike lekwekwe, unu kweru kè Kéreshi. O chia iphe, anyi shiberu ite iya bu g'anyi tuko atuko mee g'èhu kabaa unu atso-shi utso ike.

2 ¹Noo g'o gude mu gude obu mu g'o ha su le mu ta abyaedu ndu-unu; bya unu akpatsu aphu ozo. ²Le teke o bu le mu kpatsuharu unu aphu ozo; buhununu onye a-nodu emehunu g'èhu tsoje mu utso? ?Buhukwapho ndu ono, mu kpatsuru aphu-a? ³Noo g'o gude mu dee iphe ono, mu deru ono; g'o to bu ome mu byaru; me ndu gege eme g'èhu tso mu utso agbe kpatsuhaha mu aphu. Liphe, doru mu enya bu l'unu -mewaa g'èhu tso mu be ehu a-tsahakwa-pho unubèdua utso. ⁴Teke mu ede ekwo ono be o shikwa atsù mu l'èhu k'ophu ehu eshidu buru mu ehu; mbu-a; aphu jikwaru mu obu; mu nodu ehuru enyaminu ede iya. Mu te edekwaru iya gè mu kpatsu unu aphu. O chikwaa iphe, mu gude dee ya bu g'oburu iphe, e-me g'unu maru le mu yenkaru unu obu.

Aguru onye a hùrù ahùhù nvù

⁵O -buru l'o duru g'unu ha onye mewaru onye ozo egube iphe, aphu ono; unu makwaru l'o to bukwa mu be o meru iya; o kwa unubèdua g'unu ha be oome iphe, aphu obu. O le mu tee jedu iya ro efunuka. Oo 'epho iphe, mu epfu bu l'o ghuduru me o buwaru unu g'unu ha be o meru iphe, aphu ono. ⁶Onye ono be mu epfukwa su l'ahùhù ono, unu ka l'otu hua ya ono dukwaa ree; ga ta huekwa. ⁷O chia iphe, unu e-me nta-a bu g'unu ghakobe guaru iya nvu dua ya obu; a-nonya o gude agu aphu; obu phefu iya. ⁸Oo ya bu l'iphe, mu arwo unu bu g'unu mee g'o maru l'unu yeru iya-a obu. ⁹Liphe, mu shi gude deeru unu ekwo pho bukwa gè mu hushikwa unu ama; maru ?unu emeje-a iphemiphe, mu suru g'unu mee. ¹⁰Iphe, bukpo onye unu guru nvu l'iphe, bukpo iphe, o mesweru be mbèdua l'ishi onwomu guakwaru nvu. Iphemiphe, mu guru nemadzu nvu iya; mbu me o -nwekwaru iphe, mu guru nvu iya; be bukwa l'iswi ehu unu be mu no l'iphu Kéreshi gua ya. ¹¹Oo ya bu geeshi egube ono gbobuta Nsetanu g'o to gbahaa anyi l'eregede eshinu anyi machaarù iphe, o tüberu ememe majia ya enya.

Teke Pòlu nò lè Tirowasu

¹²Su-a; le teke ono, mu jerwuru Tirowasu je asa ozi-oma ke Kéreshi ono be mu rwuru je ahuma le Kéreshi mewaru uzo dukpooru mu okpobe adudu gè mu bya ejeeru iya ozi. ¹³Ole mu rwuru ophu ehu ebvukpodaaru mu ebvuru; kele mu rwuru; ophu mu ahumaduru nwanna anyi, bu Tayitosu l'eka ono. Tobudu iya bu; mu paru phe haa; o buru mu eje Masedoniya.

Etso Kéreshi gbòo ogboò

¹⁴Mu asu Chileke l'o du ike; yebèdua, shiwaa l'iphe ono, Kéreshi meru ono; eduphe anyi; anyi nodu Kéreshi l'eka agbo ogboò; k'ophu bu

ẹkameka, anyi jeru eeshi l'ehu anyi maru onye yebe Chileke bu; waa k'ophu ozi-oma ono a-vo ẹkameka pfurupfuru g'iphe, mkpo iya eshi kwekweekwee. ¹⁵Liphu Chileke be anyi du ge mkpo ozi-oma ono, eshi kwekweekwee l'ehu ndu a dzotar; me l'ehu ndu ala l'iswi ono. ¹⁶L'o duru ndu ophu mkpo ozi-oma ono atagbu l'epho; o duru ndu ophu o meru g'ephe nodu ndzu. Oo ya bu; ?bu onye suru eje egube ozi, du nno? ¹⁷Anyibedua ta arwutoshikwa ozi-oma ono arwutoshi ge ikpoto ndu ozo eme iya. Anyibedua, Chileke ziru-a egudejekwa obu iphoro epfu opfu ono l'iphu iya, bu iya bu iphe, gbaru ndu ejeru Kereshi ozi.

3 ¹?O du unu g'anyi wataru aja onwanyi ajaja ozo to? ?Bu g'e dee ekwo l'anyi bu ndu ire-lanu nu anyi g'anyi nu unu ge ndu ozo anuje unu? To ?Bu g'anyi su g'unu nu anyi ekwo, legoshi l'anyi bu ndu ire-lanu g'anyi paru ge ndu ozo apajeru? ²O kwa unubedua l'onwunu bu ekwo, e deru nu anyi. Ekwo k'ono be e deru ye anyi l'okpoma g'onnyemonye guje g'o doo ya enya. ³O buwaa g'unu goshije l'unu bu ekwo ophu Kereshi deru nu anyi g'anyi pajeru. Ekwo obu ta abudu mini-ekwo be e gude dee ya. Iphe, e gude dee ya bu Unme, shi l'eka ke Chileke; mbukwa Chileke ophu dzu ndzu. Ophu eka e deru iya abudu le mkpuma, du gokwekpu; eka e deru iya bu l'obu nemadzu.

⁴Iphe, anyi gude epfu nno bu le Kereshi mewaru anyi g'anyi gudeje ire Chileke eka. ⁵Iphe, mu epfu-a ta abukwa l'o nweru ike, du anyi l'ehu, bu ike, anyi e-gude epfu l'anyi suru eme egube iphe ono. Ike, anyi nweru bukwa Chileke be o shi l'eka; ⁶yebedua, bu iya meru anyi suru eme ga maru l'anyi bu ndu ejeru Ogbandzu ophuu ono ozi. O to bukwa eke-mu ophu e deru l'ekwo be onuje anyi nta-a. O kwa Unme-du-Nso nkiya be onuje anyi. Lekemu ophu e deru l'ekwo egbukwa egbugbu; obenu le Unme Chileke l'anuje ndzu.

⁷Su-a; o buru lekemu mgbu-onwu ono e deru kaa ya akaka le mkpuma, du bachibachi ono be gburu nwijnwii; k'ophu bu le unwu Izurelu ta adudu ike lee Mosisu enya l'iphu; mbu ogbu nwijnwii ophu e-mechaa phukashihu nu; ⁸buchia ozi Unme-du-Nso eje taa kabadaa adu akpabiri? ⁹Teke o bu l'ozi, nmaru ikpe-onwu ono du-be akpabiri egube ono be ozi k'apfubekoto ono a-kabakwanu adu akpabiri. ¹⁰Oo ya bu; l'e -pfuje iya epfufu; mu asu l'ogbu-nwijnwii ophu uzo mbu pho gude ta adudu iphe, o bu l'eka ogbu-nwijnwii ke nta-a no. Ogbu-nwijnwii ke nta-a ono bu ogbu-nwijnwii, nyiberu anyibe. ¹¹Le teke o bu l'iphe ono, l'e-mechaa phukashihu nu ono du-be akpabiri egube ono be ophu a-dwaro adudu akabakwanu adu akpabiri.

¹²Oo ya bu l'e -shinu enya anyi du l'egube iphe ono be anyi apfushi-je ike asa kpa kpa. ¹³Anyi te emedu ge Mosisu, jeru je achita ekwa phuchia iphu ge ndu Izurelu ta ahuma iya iphu g'ogbu-nwijnwii ono chihuada. ¹⁴Ebe o bukwa l'ephe ta ahumaduru iya; Chileke kwechikwaru

phẹ phọ ẹn̄ya; kele ọobujeru ẹphe -nọdu agụkpoo ẹkwo ọgbandzu k'akahu ono; mbụkwa jasụ nta-n̄-a; ọdu g'e gude ẹgube ẹkwa ono phuchikwaa phẹ phọ iphu g'ẹphe ta amaru iphe, ẹphe agụ. Ọo ẹ'pho atugba onwonye ẹ Kéreshi kpurumu l'a-phufu ẹkwa ono. ¹⁵Mbụ-a; ọobujeru teke ẹphe agụ ẹkwo ekemu Mósisu ono; mbụkwa byasụ nta-a; ẹgube ẹkwa onoya aphuchie phẹ phọ egomunggo. ¹⁶Ole ọ kwaa g'ẹkwo-opfu Chileke pfuru ẹ Mósisu bụ g'oo-dụ ndu Ịzurelu; l'ẹkwo-opfu Chileke pfukwaru ẹ Mósisu su: "Ọobujeru teke ọ ghawarụ Nnajiuphu iphu; ẹkwa ono aphufu." ¹⁷Ọo Nnajiuphu ono bụ Unme-dụ-Nsọ ono. Ọ buru l'ẹka Unme-dụ-Nsọ ono bẹ atọ l'ẹgbu shi. ¹⁸Anyibe ndu ono g'anyi ha bụ ndu adudu iphe, phuchiru anyi iphu; anyi nọdu ele ogbu-nwiiwii ẹ Chileke ono ẹn̄ya g'onye ele ẹn̄ya l'onyo; ọ gbanwee anyi; anyi dụ g'ọ dụ; mbụ shi l'ogbu nwiiwii kaba egbu nwiiwii. Onye o shi l'ẹka buru Nnajiuphu ono, bụ Unme-dụ-Nsọ.

Ẹku, nọ l'ite-urwa

4 ¹Ọo ya bụ; l'eshinu Chileke phuru anyi obu-imemini bya eworu ozi ono ye anyi l'ẹka bẹ ike ta abyakwa abvụ anyi l'ozi ono. ²Iphe, anyi jikaru bụ iphemiphe, bụ iphe-iphere; mbụ iphe, eeme ẹ mpya. Anyi te emedu iphe ẹregede; ọphu anyi agwadu opfu Chileke ngwaragwa. Iphe, anyi emejchia bụ l'anyi epfufe ọkpobe-opfu ono t̄a ya jala. Anyi anọduje l'iphu Chileke eme ẹgube ono g'on'yemonye egude nno shi l'obu iya maru ndu anyi bụ. ³Le teke ọ bụ l'ozi-oma ono, anyi ezi ono bụ iphe, e gude iphe kwechia ekwechi; ọ kwa l'ẹn̄ya ndu ala l'iswi bẹ e kwechiru iya iphe ọbụ. ⁴Le Obutuswe, bụ iya bụ ishi ẹ ndu mgboko-a bẹ woakwaru ẹka pyichia ndu bụ ekwegekwe l'egomunggo g'o mee k'ọphu ẹphe taa hụmadu ịphóró, shi l'ozi-oma ono, echiru phẹ swacha swacha ono. Ịphóró ono egoshi ogbu-nwiiwii ẹ Kéreshi. Ọ buru ẹ Kéreshi ono bẹ a hụmaru Chileke lonwiya. ⁵Ọo ya bụ; l'ọ tọ bụkwa onwanyi bẹ anyi anọduje epfu g'a maru. Ọ kwa Kéreshi Jizọsu, bụ Nnajiuphu anyi ono. Anyibedua l'ishi onwanyi bụekwapho ndu ejeru unu ozi l'iswi ẹhu Jizọsu. ⁶Ọ kwa Chileke ono, s̄uru g'ịphóró shi l'ochii nwua phoo ono bụhukwapho Chileke, meru g'ịphóró iya nwukwaapho phoo l'ime obu anyi. Ọo ya bụ gẹ ndiphe, amaru ọdu-biribiri ẹ Chileke; mbụ ọdu-biribiri, shi l'iphu Kéreshi egbu nwiiwii.

⁷Sụ-a; anyi dụekwapho g'ite, e gude urwa kpua, Chileke woru iphe ono, ereshi ire ike ono, bụ iya bụ ịphóró iya ono woru dẹ. Iphe, o gude dẹ ya nno bụ g'a hụma l'ike iya ono, nyiberu anyibe ono te eshidu anyi l'ẹka; l'ọ yẹbedua bẹ o shi l'ẹka. ⁸Aanọduje akpa anyi ẹhu tekenteke l'ẹkameka; ọle ọ tọ bụkwanu l'aakpapyajẹ anyi ishi. A -nonyaa iphe, aharu atsụ anyi l'ẹhu k'ọphu anyi taa majeeduru iphe, anyi e-me; ọle ọkpoma esihujelela anyi ike. ⁹Eemeje anyi ewere; ọle Chileke te ebuha-jekwanu anyi ẹka. E chitsuje anyi; ọle e te echigbujekwanu anyi echigbu.

¹⁰Mbòku-mbòku bẹ anyi ejeje iphe-ẹhuka ono, Kéreshi jeru teke ono, ọoby a nwùhu ono. Ọo ya bụkwapho g'aa-hụma ndzụ, shi l'ẹka Jizọsu l'ẹhu anyi. ¹¹Ọ tọ ụkwa tekenteke anyịbe ndu ọphu dzụ ndzụ ta atso-gejeduru atso-geru l'ọnu ọnwu; l'opfu ẹhu Jizọsu; g'aa-hụma ndzụ, shi l'ẹka Jizọsu, ụdụ anyi l'ẹhu ọwa-a, a-nwùhu anwùhu-a. ¹²Ọo ya bụ l'ọnwu swiru anyi; ndzụ swikwanụru unu.

¹³Sụ-a; l'ẹkwo-opfu Chileke bẹ e dekwaru sụ: “Mu kweru kẹ Chileke. Ọ bụru iphe ono meru g'o gude mu nọdu epfu opfu iya.” Ọ bụru l'anyi kweru kẹ Chileke ẹgube ono meru g'o gude anyi nọdu epfukwapho opfu iya. ¹⁴Ishi iya bụ l'anyi maru lẹ Chileke ono, meru gẹ Nnajiuphu, bụ Jizọsu shi l'ọnwu teta dzuru ndzụ ono l'e-mekwapho g'anyi shi l'ọnwu teta dzuru ndzụ opfu l'anyi lẹ Jizọsu tugharu bụru nanụ; l'ogbe teke ono tuko anyi l'unu duta bya edobe l'iphu iya. ¹⁵Iphemiphe ono bụkota l'opfu ẹhu unu. Ọo ya bụ g'eze-iphe-oma kẹ Chileke akabaa erwu ndu ụdụ igwerigwe ẹka. Eze-iphe-oma ono emee g'a ụdụ igwe kabaa ekele Chileke ekele; shikwapho nno kwabẹ iya ùbvù.

¹⁶Ọo ya bụ l'ike ta abyakpoda abvụ anyi l'ozi ono. A makwaru-a l'ẹhu anyi lịbahuwaru alibahu tẹme ọ nọdu abyawaa anwùhu; obenu lẹ ndzụ ono, Chileke nuru anyi ono bẹ ọonoduje eme mbòku-mbòku g'ọ ụdụ ọphúú ọphúú. ¹⁷Tẹme iphe-ẹhuka, anyi eje-a, ụdụ nwanphe-a; tẹme ọphu ọ ụdụ g'ọo-nọ-beru-a; l'e-mechakwaa setaru anyi ùbvù, a-ụdụ shi; mbụ ùbvù ọphu nyịberu anyịbe k'ọphu aamadụ g'aatu ọnu iya; tẹme ọphu ọ bvụdu abvụbvụ. ¹⁸Iphe, anyi chịru ọpfu ye ta abụkwa l'iphe, eele l'ẹnya; ọ chikwa l'iphe, ẹnya ta ahụmaduru. Liphe, ẹnya l'ele ta adụkwa ẹka ọono-bejeru; obenu l'ọphu a ta ahụmadu l'ẹnya l'a-nọ ojejoje.

Unuphu, anyi e-buru l'imigwe

5 ¹Anyi maru lẹ teke a phokataru nwa mkpu ọwa-a, anyi bu l'eliphe-a; bẹ anyi nweru-a unuphu ọzo, Chileke kwaru anyi. Ụlo k'ono ta abụdu ẹka bẹ e gude kpua ya. Ọ bụ ụlo ọphu anyi a-nọ ojejoje l'imigwe. ²Sụ-a; anyi a-nọjeekwapho atsu pfulu lẹ mgboko-a jasụ g'anyi a-nọ-beru. Iphe, ẹgu iya agụ anyi bụkwa teke Chileke e-me anyi ewota ogwehu ọphúú ono, Chileke e-shi l'imigwe nụ anyi ono yee g'uwe. ³Ọo ya bụ; anyi -yewaa ogwehu ọphúú ono g'uwe; anyi taa ụdedu g'anyi gba ẹhu ọto. ⁴Lẹ teke anyi nọkwadu l'ime ogwehu ọwa-a, anyi nweru nta-a bẹ anyi atskwa pfulu g'anyi vu ivu-erwa; ọphu ọ ụkwanu anyi g'a sụ l'anyi togboru ogwehu ọwa-a, anyi nweru nta-a. Iphe, ẹgu iya gbẹ agụ anyi bụ g'a gbẹ yepyabefua anyi ogwehu ọphúú ono l'eli iya. Ọo ya bụ g'ogwehu ono eshi ẹgube ono lwee ọwa-a, e-mechaa nwùhu anwùhu-a. ⁵Ọ kwa Chileke l'onwiya bụ onye eme ire l'ẹhu anyi g'eeshi g'ẹhu anyi eyee ogwehu ọphúú ono g'uwe; kẹle ọ nuru anyi Unme-ụdụ-Nsọ gude goshi anyi iphe ono, o kweru ukwe l'oo-me ono.

⁶Ọo iphe ono meru g'o gude obu nọdu eshihuje anyi ike tekenteke kpoo. Iphe, anyi maru bu le teke anyi no ndzu eme ehu anyi ehu anyi be anyi ta anodu Nnajiuphu l'eka. ⁷Iphe, anyi gude buru bukwa l'anyi kwetaru l'ebe abu l'anyi humaru l'anya. ⁸Obenu le mbedua epfu su l'obu te etedu anyi ophe; teme o nodu ehe anyi ihee aparu ogwehu owa-a haa; je g'anyi le Nnajiuphu buwaruro eburu. ⁹Ọo ya bu l'iphe, anyi ese akanya iya bu g'anyi meje iphe, du iya ree; me anyi no l'ibe iya; me anyi no le mgboko-a. ¹⁰Le g'anyi hakotakpoo; byafutajekwa bya apfuru l'iphu Kereshi me o -byaepho ekpe ikpe. Ọo ya bu; g'onyenonu a-nata iphe, rwuberu iya nu; m'o bu k'oma-o; m'o bu ejo iya-o; onyenonu anata ugwo iphe, o meru teke o no ndzu le mgboko-a.

Eshi l'eka Kereshi eshita Chileke onya

¹¹Ọ kwa l'oo l'anyi anoduje atsu Nnajiuphu ebvu opfu l'anyi maru l'oo ya e-kpe ikpe ono meru g'o gude anyi nodu anoduje eme g'anyi pfuta ndiphe yeru iya. Obenu l'oo Chileke makotaru g'anyi gbaru; teme o dukwa mu pho g'unubedua l'onwunu makwarupho anyi l'obu unu. ¹²Anyi te etukwa onwanyi epha l'iphu unu ozo; o chia iphe, anyi eme bu g'anyi goshi unu iphe, unu a-zobe okpa gude anyi eku onwunu; oo ya bu g'unu a-majeru onu, unu e-yeru ndu ono, egudeje g'ephe gbaru l'eli ehu aba abaa; hakwaa g'ephe gbaru l'ime obu phe ono. ¹³Ọ -bukpooru nu l'oo egomunggo swehuru anyi be iphe, anyi epfu bukwa Chileke be anyi epfu-doru iya. Teke o bu l'egomunggo anyi du nhamunha bukwa-a l'opfu ehu unu be o bu. ¹⁴Liphe, bu iya emeje anyi eme g'anyi eme-a bukwa eye obu ophu Kereshi yeru anyi. Kele iphe, kwatakpooru doo anyi enya okpobe edodo bu l'oo onye lanu nwuhuru l'iswi ehu oha. Ọo ya bu l'oo oha nwuhuru. ¹⁵Ọ nwuhu-chiru oha l'ophu. Ọo ya bu ge ndu no ndzu ta adzheru ndzu ono dzu-doru iya onwophe. Ọ chia g'ephe dzuru ndzu dzu-doru iya onye onoya, nwuhu-chiru phe onwu; e mechaa o shi l'onwu teta dzuru ndzu ono.

¹⁶Su-a; eshi nta-a be o to dukwa onye anyi elekwadu enya, ndiphe ele amadu; teme anyi amaru g'onye obu gbaru. Anyi -shi elejekpoonu Kereshi enya, ndiphe eleje amadu maru g'o gbaru; nta-a be anyi te elehekwa iya egube ono. ¹⁷Ọo ya bu l'onyemonye, no l'ime Kereshi buwaa onye e meru k'ophuu. Akahu iphe buwakwaru; iphemiphe buwaru iphe ophuu! ¹⁸Iphemiphe-a bukota Chileke be o shi l'eka. Chileke shikwanu Kereshi l'eka mee g'anyi l'iya doshia; bya eworu ozi k'edoshi opfu ono ye anyi l'eka. ¹⁹Ọo ya bu le Chileke shi Kereshi l'eka edoshi opfu duru yee ndiphe mgburugburu; ophu oogukoeduru phe iphe-eji, epe anoduje eme iya. Teme o yekwaapho anyi ozi k'edoshi opfu ono l'eka.

²⁰Ọo ya bu l'anyi bu ndu no-chiru Kereshi. Chileke gbẹ anyi l'eka arwo ndiphe arworwo. Anyi no-chiru Kereshi arwo unu su: unu kwe g'e doshia

opfu, òru unu lẹ̀ Chileke. ²¹Kele Chileke meru iya o vuta iphe-ẹ̀ji anyi l'opfu l'ẹ̀be abụ́ l'o mejeru iphe-ẹ̀ji; k'opfu anyi e-shi iya l'ẹ̀ka tũko bya abũru ndu p̄fuberekoto gẹ̀ Chileke.

6 ¹Oo ya bụ́ l'anyịbe ndu anyi lẹ̀ Chileke gba mgba eje ozi-a; l'arwo-kwa unu arwo-wo sụ́ g'unu ta anatakwa eze-iphe-oma ke Chileke-a mee ya g'ò buru ọ̀la-l'iswi. ²L'ò sũkwaru:

“Teke ọ̀ gbaru l'angabẹ̀ nchị́
bẹ̀ mu ngaberu ngu
nchị́.

O rwua l'eswe ndzọ́ta;
mu dzoo ngu.”^a

Gẹ̀ mu kakwaru unu; ọ̀ kwa nta bụ́ eswe eze-iphe-oma ke Chileke. Ọ̀ kwa ntanụ́ bụ́ eswe ndzọ́ta.

Iphe-ẹ̀huka, Pọ̀lu eje

³Ọ̀ tọ̀ ò dũkwa onye ọ̀ dũ anyi g'a sụ́ l'o p̄futoşhiru ozi, anyi eje. Ọ̀ buru iphe ono meru g'ò gude anyi òdu eme g'ò tọ̀ dũ onye umere anyi a-gbẹ̀ buru up̄fu dũ iya l'okpa. ⁴Ọ̀ chia iphe, anyi emejechia bụ́ l'anyi egudeje iphemiphe, byapfutaru anyi egoshi l'anyi ejeru Chileke ozi. Anyi atajẹ̀ nshi mẹ́ iphe-ẹ̀huka -byapfuta anyi; ọ̀zoo mẹ́ oke mkpa -byaru anyi; ọ̀zoo mẹ́ a -nòdu akpa anyi ẹ̀hu. ⁵Eechi anyi iphe; bya atụ́ anyi mkpọ̀ro; bya eyeru anyi mkpaka. Anyi ejegbu onwanyi l'ozị; ẹ̀be anyi edobejedu ishi l'oshi; anyi òdu akwa egu. ⁶Ntũcha ta adũkwa lẹ̀ ndzụ́ anyi; iphe òdu edoje anyi ẹ̀nya; anyi òdu atajẹ̀ru iphe nshi; nweru obu oma; òdu l'ẹ̀ka Unme-dũ-Nso; nweru n-yemobu op̄fu abũdu l'eli-onu; ⁷epfu ire-lanụ́; òdu l'ike ke Chileke chĩru ngwoḡu k'ap̄fubekoto l'ẹ̀kutara mẹ́ l'ẹ̀kicha; ⁸mẹ́ a -nòdu akwabẹ̀ anyi ùbvũ; ọ̀zoo l'akwa anyi eswe; mẹ́ a -nòdu epfu l'anyi eme ẹ̀ji; ọ̀zoo l'epfu l'anyi eme ree; eeme anyi g'anyi bụ́ ndu ẹ̀regede; obenu l'anyi bụ́ ndu ire-lanụ́; ⁹eeme anyi gẹ̀ ndu amadũ amama; obenu l'a makwanũru anyi rengurengu; gẹ̀ ndu anwũhu anwũhu; ọ̀le anyi dzũkwanu ndzụ́; gẹ̀ ndu echi ẹ̀chachi; ọ̀le e te echigbukwanu anyi echigbu; ¹⁰gẹ̀ ndu agụ́ aphụ́; ọ̀le anyi anòdujeele-a ete ẹ̀swa tekenteke; gẹ̀ ndu ụ̀kpa; ọ̀le anyi meru ikpoto ndu nemadzụ́ ẹ̀phe nweru iphe; gẹ̀ ndu adũdu iphe, ẹ̀phe nweru; ọ̀le anyi tũkoru iphemiphe, nweru.

¹¹Sụ́-a; unubẹ̀ ndu Kòrentu; anyi tọ̀gboakwaru unu iphemiphe ẹ̀ba; anyi bya eghebewaru unu ọ̀kpoma anyi onu. ¹²Anyi te ewofukwaru unu obu; ọ̀ chikwa unubẹ̀dua wofuru anyi obu. ¹³Sụ́-a; unu gheberu anyi obu unu onu g'anyi gheberu unu obu k'anyi-a. Nta bẹ̀ mu ep̄fuakwaru unu opfu, nna ep̄fujeru unu iya.

Ezehuru iphe, adũdu Chileke ree

¹⁴Unu lẹ̀ ndu ekwedu ke Chileke ta atũgbakwa buru nanụ́. Kele-a; ?bụ́ gũnu bẹ́ ap̄fubekoto yẹ̀le eme ejo-ememe gude buru nanụ́? ?Denu

^a 6:2 Gũnaa Azá 49:8.

g'ìphóró yẹle ọchii e-shi dogba ẹhu? ¹⁵Kéreshi yẹe Obutuswe ta ayìkwa chĩa idzù agbarù mgba mee iphe lanù. Ọo ya bụ; ?bùhunu gunu bẹ onye kweru kẹ Chileke yẹe onye ekwedu kẹ Chileke gba mgba? ¹⁶Sù-a; ?dẹ-nu g'eeshi wota eze-ùlo Chileke yẹe ùlo-nshi dogbabe? Ọ kwa anyi bụ eze-ùlo Chileke; mbù Chileke ọphu nọ ndzù. Lẹ Chileke pfukwaru iya l'onwiya sù:

“Mu e-buru eburu l'ime
phẹ tsojeru phẹ eje
ẹkameka, ẹphe eje.
Mu aburu Chileke,
doberu phẹ nù;
ẹphe aburu ndibe mu.”^b

¹⁷Noo g'o gude Chileke pfukwaaphọ sù:

“Unu hofuta onwunu l'echilabo
phẹ bya anọdu iche.
Unu te eyejekwa ẹka l'iphe,
aasọ nsọ gẹ mu
anatakwanù unu.”^c

¹⁸Ọo ya bụ gẹ mu aburu nna
unu;
unu aburu unwu mu
unwoke mẹ unwu mu
unwanyi.”^d

Nokwa iphe, Nnajiuphu, bụ Ọkalibe-Kakọta-Ike eepfu.

7 ¹Sù-a; ndu mu; eshinu Chileke kweru anyi ukwe-iphe dù ẹgube-a; g'anyi safukotanunwanyi iphe, bukpo iphe, emerwù ogwehu bya emerwù obu nemadzù. G'anyi tsuje Chileke ebvu; g'anyi kukebeje ẹhu buru ndu dobekotaru onwanyi iche k'ọphu anyi a-bukotaru kẹ Chileke ọkpobe aburu; meje iphe, ọ sùru g'anyi meje.

Èhu-ùtso Pọlu

²Unu menaa g'anyi maru l'anyi dukwadia unu l'obu. Ọ tọ dukwa g'unu ha onye anyi mesweru; ọphu ọ dukwa onye anyi dephuru; ọphu ọ dufwapho onye anyi gudeje ugho mee iphe, apfuduru-oto. ³Iphe, mu epfua ta abukwa lẹ mu agbarwushi unu agbarwushi eshinu mu pfuhawaru sù l'unu dukwa anyi l'obu shii. Anyi l'unu bụ nanù; mẹ anyi dzù ndzù-o; mẹ anyi nwuhuru anwuhu-o. ⁴Mu anọduje asa kpaa kpaa l'opfu ẹhu unu; mu nọdu egudeje unu aba l'abaa. Anyi nọ lẹ mkpamehu; ọle unu adujekwanu mu obu; tẹme ẹhu nọdu atsoje mu ntumatu mẹ mu -nyata unu.

^b 6:16 Gúnaa Uke 26:12; Jier 32:38; Ezek 37:27. ^c 6:17 Gúnaa Azá 52:11; Ezek 20:34,41.

^d 6:18 Gúnaa 2Sám 7:14; 2Sám 7:8.

⁵L'anyi batakwaru Masedoniya; ophu ehu ebvubaeduru anyi ebvuru. A nodu emeeppo anyi mkpawere l'ekameka. Opfu du l'etezi; ndzu-agugu du l'ime-ulo. ⁶Obenu le Chileke, bu onye aduje onye aphu tsoru obu be gudewaa abyabya, Tayitosu byaru gude dua anyi obu. ⁷Ophu o budua abyabya, o byaru kpuru-mu; edo, o dokpoodaru anyi g'unu gude dua ya obu yichakwapho l'iphe, duru anyibedua obu. O pfuru anyi su l'ogogushi unu egu ike ge mu l'unu huma; l'unu agu aphu okpobe agugu k'iphe, unu meru; teme l'unu agbajeru mu odzori shii. Onoya be mekpooru mu ehu kabakpo mu atso utso nta-a.

⁸Lo betakponu ekwo-ozii-a, mu deru-a nodu eme g'aphu ji unu obu; mu ta atakwa onwomu uta le mu deru iya. Teke mu gege ata onwomu uta bukwa teke mu humaru le mu gude iya mee g'aphu ji unu obu; obetaru o buerupho ke nwa teke ono. ⁹Obenu le nta-a be ehu atsowaa mu utso. Ehu-utso mu ta abukwa l'oo le mu meru aphu ji unu obu. Ehu-utso mu bukwa l'aphu ono meru izimanu iphe-eji unu lwa unu azu. Aphu k'ono bukwa aphu ophu meru g'unu mee iphe, du Chileke ree. Oo ya bu l'o to dudu iphe, anyi mekataru unu. ¹⁰Kele nggumaphu ophu du Chileke ree emeje g'izimanu lwa nemadzu azu g'adzoo ya; ophu atadu onwonye uta iya k'ono. O bekwanu le nggumaphu k'unwu-eliphe legbu egbugbu. ¹¹Unu humaanaro iphe aphu ono, du Chileke ree ono meru. Unu humaanaro g'unu yeberu ehu l'eme g'a maru l'unu pfuberekoto l'iphu Chileke. Unu humanu g'iphe, meru nu nwu-beru unu oku l'ehu. Su-a; unu humanu g'unu atsube ebvu iphe e-menu. Unu humaru g'ogube unu egu g'unu huma mu; unu humaru g'oolwube unu l'obu g'unu gbaaru mu odzori. Unu humaru go du-be unu g'unu hua onye ono, mesweru nu ono ahuhu. Lime iphemiphe ono be unu goshiru l'o to dudu aka o deru unu.

¹²Oo ya bu l'edede, mu deru ekwo-ozii ono ta akwatakwa buru k'iswi ehu onye ophu mesweru nu; ozoo k'iswi onye ophu o mesweru. Iphe, mu gude dee ya bukwa go mee g'unu maru g'unu agbaberu anyi odzori l'iphu Chileke. ¹³Noo ya bu l'oodu nu pho anyi obu.

A -gufukpooro adu obu ophu unu duru anyi; ehu kabakpooro anyi le Tayitosu utso l'unu tukoru g'unu ha mee ya ehu bvuru iya ebvuru. ¹⁴Le mu tukwaru Tayitosu onu unu; gude unu aba l'abaa; e mechaa; o buerupho ge mu pfuru bu go du; ophu unu emeduru mu iphe-iphere. O to dudu teke anyi ete epfujeduru unu iphe, bu okpobe-opfu. Nokwapho g'iphe, anyi pfuru Tayitosu k'ehu unu tukoru buru eviya. ¹⁵O buru iya meru go gude o nodu akajebaa unu eyeshi obu ike me o -nyata l'unu g'unu ha atukoje eme iphe, mu suru g'unu mee; waa me o -nyata g'unu gude ndzu-agugu gude ayo oshi k'anonyakwaa unu mee iphe, adudu iya ree; unu gude egube ono meshiaru iya l'ibe unu. ¹⁶Nta-a be ehu atsokpoo mu atsoshi mu iya ike le mu gude ire unu aka okpobe egude l'iphemiphe.

Gẹ ndu ke Kéreshi a-nuje iphe

8 ¹Iphe, anyi eme g'unu maru; unwunna mu; bu k'eze-iphe-oma, Chileke meshiru le Chiochi, nogbaa le Masedoniya. ²Kele mkpamehu,

a kparu phe huru phe ama hushia phe iya ike. Oe ehu tsoleru phe-a tsoshia phe iya ike teke ono; k'ophu ephe saru eka sagharu iya eka l'anu Chileke iphe; l'ebe abu l'ephe nweru iphe ilile. ³Gẹ mu e-pfubeeru iya pho bu l'ephe nuru g'eka ha phe; bya anukwapho nughata egube ono. Ephe tukpooru obu phe onyo ⁴rwoo anyi rwoshia anyi ike su g'anyi kweru g'ephe le ndu ke Kereshi ozo gbaru mgbu nje iphe, g'e gude gbaaru ndunso mkpu. ⁵Ephe meberu iphe ono g'anyi aru-vujeduru l'egomunggo. Ephe vukpodaru uzo gbeshi bya eworu onwophe ye Nnajiuphu l'eka; teme ephe gbeshi bya eworu onwophe yehukwapho anyi l'eka, bu iya bu g'o du Chileke ree. ⁶Noo g'o shitaru anyi rwoo Tayitosu; yebedua, bu iya gbu-beru ishi eje ozi ono; su iya g'o mekpokwapho iphe, oome; g'o yekwaru unu eka g'unu jefufu ozi ono, unu eje ono l'ishi; mbu ozi ono, unu eje k'eze-iphe-oma ono. ⁷Iphemiphe, unu nweru be unu nwekwaru nwegharu iya eka; mbu l'unu kwetaru kwegharu iya eka; pfua opfu Chileke pfugharu iya eka; maru ke Chileke magharu iya eka; bya ekukebe ehu eye eka; bya eyekwapho anyi obu yeshia ya ike. Oo ya bu g'unu nukwapho iphe nugharu iya eka g'e gude jee ozi k'eme iphe-oma ono.

⁸Iphe, mu epfua ta abukwa l'oo anmakobe; mu nodu anmakobe iya unu. Oo iphe, mu eme bu ge mu goshi unu g'oggu-be ndu ozo egu eye eka; shi egube ono mee unu g'unu goshi l'eye obu ophu unu yeru bua okpobe eye obu. ⁹Kele unubedua mahukwarupho eze-iphe-oma, shi l'eka Nnajiuphu anyi, bu Jizosu Kereshi; l'a makwaru-a le Kereshi nweru iphe shii; obenu l'o woleru-a onwiya mee onye ukpa l'iswi ehu unu. O buru iphe, o meru bu g'oo-shi laburu onye ukpa ono mee g'unu nweru iphe shii.

¹⁰Onu, mu e-ye l'opfu ono bu le-a; o karu unu ree l'unu gbẹ nta-a mefufu iphe ono, unu wataru akaphuru ono l'ishi; kele o to budua l'oo unubedua vu uzo chia idzu iya; o kwapho unubedua vu uzo wata iya ememe. ¹¹Ngwa; unu kukebenu ehu mee ya gbiriri jasu unu emebe iya. O kwapho g'o phuru unu aphuphu l'ehu teke unu wataru iya ememe bu gemefufu iya a-nodu aphu unu l'ehu. G'iphe, unu gude eme iya bukwarupho g'eka beru unu. ¹²Le teke o bu l'oggu ngu agugu anu Chileke iphe; be Chileke a-natakwa iphe, i nuru iya okpobe anata. Chileke atuje iphe, onyemonye nuru iya le g'onye ono nweberu. O too tukwa iya le g'onye ono enwedu.

¹³O to bukwa iphe, mu epfu nta-a bu l'oo ge mu pata ivu ndu ozo bofua unu g'unu vuru; ephebedua agbaru eka. ¹⁴Obenu l'eshinu unu ka ndu eeje eyeru eka obu enweru iphe shii ke nwa nta; be iphe, du ree bu g'unu gbataru phe le mkpa, duru phe nu. Teke mkpa dukwanuru unubedua; ephebedua nweru shii ephe a-gbataru unu. Oo ya bu l'unu ibekeboebo be eyeru onwunu eka enya nhamunha. ¹⁵O n'ia bu iphe, e deru lekwo-opfu Chileke su:

“Onye kpotaru shii te
ekpoghaduru iya ẹka.
Ọphu onye kpotaru nwanshii
ekpopeteduru.”^e

Tayitọsu yẹle ndu ẹphe l'iya swi

¹⁶ Anyi ekele Chileke ekele shii kẹ l'ọ kwaphọ g'ọpohu anyi l'obu eyeru unu ẹka bụ g'ọpohuhukwapho Tayitọsu. ¹⁷ Ọ tọ buda l'ọ nataru arwo-rwo, anyi rwo iya kpurumu; obenu l'ọpohu iya l'ẹhu eye ẹka shii k'ọphu ọ turu obu iya onyo sụ lẹ ya a-byapfutashia unu. ¹⁸ Anyi yekwarupho nwanna anyi nwoke gẹ yẹ l'iya swiru. Nwanna anyi ono bụ onye a kwatakpo akwabẹ ọkpobe ùbvù l'iphe, bukpo Chiochi lẹ Chiochi. Ọ buru g'o gude ezi ozi-oma ono. ¹⁹ Teme a -gufukwaro onoya; ọ kwa Chiochi gẹ Chiochi ha hotaru iya woru iya ye sụ g'o tsoje anyi je ozi ono, anyi gude agbataru ununna anyi ono. Anyi gude ozi ono ekutse Nnajiuphu teme anyi gude iya egoshi l'ọ dọ anyi g'anyi yeje ẹka.

²⁰ Anyi tokwaru nwehu dee ẹnya lẹ mini eme k'ọphu ọ tọ dudu onye a-ta anyi uta g'anyi gude eme k'iphe-oma ono, nyiberu anyibe ono, e yeru anyi l'ẹka ono. ²¹ L'iphe, anyi tumberu ememe bukwa g'anyi meje iphe, dọ ùbvù l'ẹnya; ọ tọ bukwa ọphu dọ ùbvù l'ẹnya Nnajiuphu bẹ anyi e-meje nkinyi iya; obenu g'ọ bukwarupho iphe, dọ ùbvù l'ẹnya ndiphe.

²² Teme anyi yekwaphọ nwanna anyi ozo sụ g'ẹphe swiru bya. Nwanna anyi k'ono bẹ anyi ahujekwa ama tekenteke maru l'iphe, agụ iya nọ bu-epho gẹ ya e-me eye ẹka. Nta-a bẹ ọ kabakpo ya aphụ l'ẹhu gẹ ya yeru unu ẹka; kele o gude ire unu ẹka kẹ b'ama g'e-me iya. ²³ A bya lẹ Tayitọsu; mu sụ l'ọo ya bụ mu onye ẹbo; onye mu l'iya tukoru eje ozi-oma gude eyeru unu ẹka-a. Ununna anyi ọphu, ẹphe l'iya swi-a bukwanu ndu ọphu nọ-chiru ẹnya Chiochi lẹ Chiochi teme ẹphe buru ndu ekutse Kereshi. ²⁴ Unu goshikwa ẹphebedua waa Chiochi l'ọphu l'unu yeru anyi obu ọkpobe eyeye; teme l'aba, mu egudeje unu aba bụ-a l'ọ rwuberu iya.

Eme iphe-oma

9 ¹ Mu te ejeeduro unu ederu ekwo k'iche k'iphe, unu a-nu ndu-nsọ, nọ lẹ Jierusalemu. ² L'ọ doru mu ẹnya l'ọogua unu ẹgu eye ẹka; mu gudewaa unu aba l'abaa l'iphu ndu Masedoniya. Lunube ununna anyi, nọ lẹ Akaya kwakobeakwaru k'eye ẹka e -shi k'akaphu. L'aphuphu, ọpohu unu l'ẹhu k'eye ẹka ono kpatsuwaru ndu dọ igwerigwe. ³ Iphe, kparu iphe, mu suru g'ununna-a bya bụ g'aba ono, anyi gude unu aba ono ta abụ iphe-mmanu. Ọ bụ-chia g'ọ dọ gẹ mu pfuru sụ l'unu kwakobewaru eye ẹka. ⁴ Ọdumeka; ọ -buru lẹ mu lẹ ndu Masedoniya haru swiru bya; anyi bya ahuma l'ọ tọ dudu

^e 8:15 Gūnaa Awụ 16:18.

g'unu kwakòberu; ọ kwa iya bụ l'iphere abụru k'anyi; kele mu sụwaru l'unu kwakòbewaru ree; ọ bụruro unu bẹ iphere k'unu a-kabaa shii. ⁵Noo g'o gude mu sụ l'ọ dū ree g'unwunna-a vuru mu ọzọ byaadaa ibe unu bya evuru ọzọ kwakòbe iphe ono, unu kweru ukwe anụnu ono. Ọo ya bụ g'aamaru l'unu gude obu unu g'ọ ha anụ iya; l'a ta atupfubeduru iya unu atupfube.

Eme omeluko

⁶Iphe, unu a-nyatajẹepho bụ l'onye emebeduru iphe, ha shii l'alị ta akpatajẹkwa iphe, ha shii. Onye mebekwanuru iphe, ha shii l'alị bẹ akpatajẹ iphe, ha shii. ⁷G'onyenononụ nọepho g'obu iya sūru g'ọ nū. G'ọ tọ dukwa onye a-nū ọphu ọogbe buri; ọ -nuchaa ya l'ọ taahaa onwiya uta; ọphu ọ dukwa onye anọdu anụ iya g'ọ bụ utu, ọ tufutaje; kele ọ kwa onye gude ẹhu-utso anụ bẹ Chileke yeru obu. ⁸Ọzo buri lẹ Chileke sūkwaru emeru unu eze-iphe-oma mee k'etsutsu iya; k'ọphu unu e-nwekọtajeru iphemiphe, bụ iphe, mkpa iya dūru unu; unu abyakwaphọ enweru iphe nwegharu iya ẹka k'ọphu unu e-gude iya eme iphe, bụ iphe-oma. ⁹Ọo ya bụ iphe, e deru l'ẹkwo-opfu Chileke sụ:

“Oosaje obu iya asasa nū ndu
 ukpa iphe;
 apfubekoto nkiya anọje
 jasụ l'ojejoje.”^f

¹⁰Ọo Chileke, bụ iya anuje onye akọ opfu iphe, oomebeje l'opfu iya; bya anuje iya nri sụ g'ọ ria-a; bẹ bukwaphe onye a-nū unu akpuru-iphe, mkpa iya dūru unu; unu akọo. Ọ buri iya bụ onye e-me g'iphe, unu meberu l'alị mehu emehu k'ọphu unu a-kabaa enwenwe; gude iya kabaa eme iphe-oma ono, unu eme ono. ¹¹Chileke ono e-me unu g'unu nweru iphe ọkpobe enweru k'ọphu unu e-meje iphe-oma tekenteke; ọo ya bụ g'aa-dū igwe keleje Chileke ekele iphe-oma, unu shi anyi l'ẹka emeru pẹ. ¹²L'ozī-a, unu eje-a ta abulekwa-a mkpa ndu kẹ Chileke bẹ oome kpurumu. Iphe, o mefua bụ l'aa-dū igwe kele Chileke ekele kelegharu iya ẹka. ¹³Ọ kwa iphe ono, unu eme ono e-goshi ẹgube ndu unu bụ. Noo ya bụ aadū igwe jaa Chileke ajaja. Noo l'ọ tọ bukwa l'unu gude iphe ono, unu meru ono goshi l'unu kwetawaru k'ozī-oma Kéreshi ono; unu egoshikwaphọ l'unu emeje iphe, ozi-oma ono pfuru. Bụ iya bụ l'unu asajẹ ẹka ọkpobe asasa mee iphe-oma g'ẹka beru unu; unu shi ẹgube ono unu l'ephebedua mę ndu ọzọ tuko gbarụ mgba l'iphe, unu nweru enweru. ¹⁴Ọo ya bụ l'ephe e-gudekpoo obu pẹ epfu anụ Chileke l'iswi ẹhu unu; l'ogukpo pẹ g'a sụ l'unu l'ephe humaru; noo l'eze-iphe-oma kẹ Chileke nyiberu anyibe l'ẹhu unu. ¹⁵Sụ-a; unu g'anyi keleje Chileke ekele iphe-oma iya; mbụ iphe-oma ono, a ta amadū g'aa-tū ọnu iya ono.

^f 9:9 Gūnaa Ebvu 112:9.

Polu agbaru ozi-oma õdzori

10 ¹Nta-a buakwaa mube Polu gẽdegede arwo unu arworwo owa-a. Mu gudeakwaa adu gelee waa obu-oma ke Kereshi arwo unu. Mbẽdua abujekwaru mu -noðu ntse mu epfuru unu opfu bebebe; teke mu no ẽnya; mu epfuaaharu unu opfu okpu-onu okpu-onu. ²Ole iphe, mu arwokwanu unu bu g'unu te emekwapho iphe, e-me ge mu pfuaharu unu okpu-onu okpu-onu me mu -byaepho. Le mu e-pfukwaru ndu ono, suru l'anyi eme ehu anyi ehu anyi ono okpu-onu okpu-onu. ³La makwaru-a l'anyi bu le mgboko-a; ole anyi ta alwudu ogu ge ndu mgboko-a l'alwu. ⁴Kele ngwoгу, anyi gude alwu ogu k'anyi ta abukwa ngwoгу ke ndu mgboko-a. O bu ngwoгу, shi leka Chileke; bya aburu ngwoгу ophu shihuru ejo ike. O bu ngwoгу ophu e gude egbuka eka ohogu Chileke doberu obu okpehu iya. Oo ya be anyi gude emebyi ntumego-ugho. ⁵O buru ngwoгу ono be anyi gude mebyishikota eku-onwonye ono, e gude to-chia uzo to-buta ga ta maru Chileke ono. Iphe, bukpoo oriri, nemadzu ari ariri be anyi alwu-kpeje mee ya go du ge Kereshi suru go du. ⁶Nta-a be anyi kwageberu akwagebe k'ahu iphe, bukpo a-nu-le-nchi ahuhu me unu meebekotajepho iphemiphe, a suru g'unu meje.

⁷Iphe, unu l'iya eme bukwa l'unu te elerwejedu iphe ẽnya elerwe. Onye guwaru onwiya le ya bu ke Kereshi; g'onye ono nyatajeru onwiya lo bu ge ya bu ke Kereshi ono bu g'anyi bukwapho. ⁸Lophu unu a-makpodaru bu lo to dukwa mu iphere m'obetaru mu kwata gudenuka ike ono, Nnajiuphu yeru anyi leka ono aba abaa. Ike ono be o nukwaru anyi g'anyi gude metse unu emetse. O to nukwaru iya anyi go buru iphe, anyi e-gude egbuka unu egbuka. ⁹Noo iphe, mu epfu su g'unu b'edobesukwa le mu gude ekwo-ozu mu-a eme ge mu yee unu ebvu. ¹⁰O dukwaruro ndu agbe asuje: "Ekwo-ozu, Polu ede be opfu iya agbeje adanuka kpa kpa; bya aburu opfu, erwu nemadzu lehu. Teke anyi l'iya noepho l'iphu l'iphu; oogbe nyihu; opfu iya te enweedu iphe, ooburu." ¹¹Go dokwaa egube onye ono ẽnya lo kwa iphe, mu deru lekwo-ozu teke mu l'unu anodu bukwapho iphe, mu e-me leka me mu l'unu -noðuepho.

¹²Ophu anyi ata atudu ama bu ke g'anyi wota onwanyi je agukobe le ndu ono, anoduje atu onu onwophe ono. Ozo ke g'anyi su l'anyi lephe aturu. Oo ephebedua eme eswe; ephebedua egudeje onwophe aturu onwophe ama; gude ge nwibe phe ha amaru g'ephebedua ha. ¹³Obenu l'anyibedua taa tudu onu onwanyi atughata ge Chileke tũberu su g'anyi rwua. Anyi a-tu-bejerupho onu onwanyi gozi, Chileke doberu anyi g'anyi jee gbaru. Ozi ono be ophu anyi eje l'echilabo unu tukokwa yiru. ¹⁴Anyi ta tughakwaru onu iphe, anyi meru; eshinu anyi gudewaa ozi-oma ke Kereshi ono rwuchawaa eka unu no gẽdegede; teme o buru anyi bu ndu mbu, gude iya byapfuta unu. ¹⁵Oo ya bu; l'anyibedua ta atujedu

onu onwanyi tughata gę Chileke tumberu sụ g'anyi rwua. Anyi te egudeje-du ozi ndu ozo aba l'abaa. O kwa iphe, anyi ele ęnya iya bụ l'unu -nọdu aka ekweshi ike eje; anyi aka eje ozi, kabaa shi l'echilabọ unu; kele anyi a-nọdujeepho eme iya gę Chileke sụru g'anyi mebejeru iya. ¹⁶Oo ya bụ g'anyi ezia ozi-oma ono zighatachaa ya mkpukpu unu; ziwa iya rọ kwase-ru; k'ophu anyi ta anọdukwanu aba abaa ozi, onye ozo jehawaru l'eka iya nkiya.

¹⁷Ooepho “G'onye aba abaa bajekwa iya l'iphe, Nnajiuphu meru.”

¹⁸Kele o tọ bukwa onye atụ onu onwiya bę aagubeje iphe; oo kwa onye Nnajiuphu atụ onu iya.

Ndu-ishi-ozu ophu abudu okpobe iya

11 ¹Jiko unu takwaa nshi gę mu kabekpo pfua g'onye eswe; mu makwaru-a l'unu kwewaru. ²Lę mu ekokwaru unu okophoo gę Chileke ekoje-a. Kele unu dukwa mu gę nwamgboko, doberu onwiya do, nwoke eteke ngeswee okpa; nwamgboko, mu doberu k'eke ji; mbukwa k'eke onye lanu kpekpu, bụ iya bụ Kereshi. ³Ole ndzu anọduje agu mu sụ ?a maru teke agbaghashidu nu unu obu; merwushia uche unu g'unu te egudehe obu unu g'o ha yee Kereshi obu okpobe eyeye. O kwa egube ono bę agwo meru gude ejo ęregede dephua Ivu. ⁴Kele unu gude ehutso kwe k'onye byaru bya awata epfuru unu ke Jizosu ozo, abudu ophu anyi pfuru unu opfu iya-a; teme unu kwe natakwapo unme ozo, du iche, abudu Unme-du-Nso ophu unu natahawaru; bya ekwekwapho nata ozi-oma ozo, du iche, abudu ophu unu kwetahawaru.

⁵Liphe, mbedua ariekwa bukwa l'o tọ budu mu bę ęnya gbę bya akachia alwalwa eme lę ndu ono, ezi unu ozi-oma ono, etu onwophe o-phushia-ugbu ono. ⁶O -buru lę mu ta ama epfu opfu ęrengete; mu amakporu nu Chileke okpobe amaru. Ono bę anyi shiwa l'uzomuzo mee unu maru okpobe amaru.

⁷O gbę buru iphe-eji bę mu meru; lę mu kuzetaru onwomu ali g'eeshi g'e kulia unu eli; ebe o dudu iphe, mu suru g'unu pfua mu k'ozu-oma Chileke, mu byaru ezia unu? ⁸Teke mu shi eje ozi l'echilabọ unu; bę bukwa Chiochi ozo shi anọduje apugbaa mu ugwo. Mu shikwa ana phe nfu; g'eeshi gę mu yeru unu aka. ⁹Su-a; mkpa okpoga, duru mu nu teke ono, mu l'unu no ono ta adukwa onye mu pfuchijeru nchi sụ g'o yeru mu aka. Kele unwunna anyi ndu shi Masedoniya wotakotawaru mu iphe, bukpo iphe, mkpa iya duru mu. Mbụ l'o tọ dudu iphe, mu zekporu unu nzeri iya. Ebe o dukwa iphe, mu byaru ezeru unu nzeri iya. ¹⁰Mu gude okpobe-opfu ke Kereshi ophu du mu l'ehu ekweta ukwe-a sụ l'o tọ dukwa nemadzu, a nwuru anwunwu l'ali Akaya, suru eme g'aba-a, mu aba-a buru iphe-mmanu. ¹¹?Denu g'o gude mu yee ya onu nno? ?Bu lę mu te eyeduru unu obu to? A-o! O kwapho Chileke maru lę mu yeru-a unu obu.

¹² Mu taa hakwa eme iphe, mu gude l'eka eme nta-a. Oo ya bu ge mu emekwanu-a ndu-ozì ophunapho g'ephe te enwehe iphe, ephe a-zobe okpa gude eku onwophe; kele o kwapho g'anyi ese akanya ozi-oma ono bu g'ephe ese. ¹³ Ndu k'ono ta abukwa okpobe ndu-ishi-ozì Kéreshi. Ephe bukwa ndu eje ozi l'ugho. Ndu ewojeru onwophe mee g'e dobesu l'ephe bu okpobe ndu-ishi-ozì ke Kéreshi. ¹⁴ O to budu iphe, aa-su l'o kporu onu opfu; eshinu Nsetanu ewojeru onwiya mee g'ojozì, shi l'ogbu-nwiinwii k'imigwe bya. ¹⁵ Oo ya bu l'o to buedu iphe, du oke biribiri me o -buru le ndu ejeru Nsetanu ozi woru onwophe mee g'e dobesu l'ephe bu ndu ejeru Chileke ozi. Teke o rwuru mboku ikpazu be Chileke a-gwa phe ugwo ochi iphe, ephe meru.

Iphe-ehuka, Polu eje

¹⁶ Ge mu pfukwaa ya ozo; g'o to dukwa onye arije l'oo egomunggo swehuru mu. Teke o bu l'unu ari l'egomunggo swehuru mu; unu ahakpokwaa mu ro ge mu pfubaa g'onye egomunggo swehuru. Oo ya bu ge mu abakwanaa aba nwilile. ¹⁷ Ole iphe-a, mu epfu nta-a be mu makwaru-a l'o to budu Nnajiuphu suru ge mu pfua ya. Mu -baaha aba be mu abakwa iya g'onye egomunggo swehuru. ¹⁸ Ole eshinu ndiphe egudeje iphe ke mgbo-ko-a aba abaa be mbedua l'a-bakwapho aba nkemu. ¹⁹ ?To buedu l'unu manukaru iphe meru g'o gude unu nodu egudeje ehu-utso kwe haa ndu egomunggo swehuru g'unu l'ephe nodu. ²⁰ Unu atajeelaa nshi no-kirishia; a -nonyaa onye lanu abya eworu unu mee nwohu iya; ozo bya anodu tuko iphe unu riebe; ozo bya anodu emephe unu l'uji; ozo bya awata unu anma phulaphula; ozo bya eworu eka waa unu le nchi ke gbaa. ²¹ Ha! O gbekwa du mu iphere epfufu; noo le mbedua ta adukwa teke mu adu ike eme unu egube iphe ono.

Ole-a; owa-a, mu abya epfufu-a bukwa opfu, du ge k'onye egomunggo swehuru. Su-a; e -pfujekpo ya epfufu; mu asu l'iphemiphe, bukpo iphe, ndu ozo turu ama egude aba l'aba be mbedua gudekwaa aba l'abaa nkemu. ²² O -buru le ndu ono bu ndu Hiburu; be mbedua buhukwa iya pho. Teke ephe bu unwu Izurelu; mbedua buhukwapho onye Izurelu. Teke ephe bu oshilokpa Ebirihamu; mbedua buhukwaa oshilokpa Ebirihamu g'ephe bu iya. ²³ Mu su-a; ?ephe bu ndu ejeru Kéreshi ozi to? Ono be mbedua gbekwa ka phe nu abubu. Nta-a be mu epfukpoakwa g'onye, obvu byaru. Mu kakwa phe iya abubu; ge mu gbekwa ka phe eje ozi ke Kéreshi ono; bya aka phe eje mkporo iya ijeto; a kakwa mu pho echi iphe iya ichito. Ophu o dudu tekenteke mu ta atsogjeduru atsogeru l'onu onwu le k'ozì ono. ²⁴ Akpo ise be ndu Jiu chiwaru mu onu echachi ukporo labo, e wofuru nanu. ²⁵ E chiwaa mu mgboro akpo eto; bya atuwaa mu mkpuma akpo lanu. Akpo eto be o phoduchawaru nwanshi me ugbo ekpua mu. O nwecharu ophu mu noru ujiku ophu le mini eswe lenyashi mgburugburu.

²⁶L'ikpoto ije ono, mu jekọtaru ono bẹ mu l'owaru ishi mu alọlo l'utso, gbaru nū; l'ọo ishi mu alọlo l'ẹka ndu ana nfụ; mẹ l'ẹka ndu Jiu ibe mu; mẹ l'ẹka ndu abụdu ndu Jiu. Mu jee iphe mini pharu mu leze l'oma mkpụ-kpu; mẹ l'echiẹgu; mẹ l'echi ogbu eze-enyimu; mẹ l'ẹka ndu abụdu ọkpobe ndu kẹ Kéreshi. ²⁷Mu jewaa ozi kuta ẹphuru phee; mu bya anwuwaa ẹnya ẹnyashi; ẹgu nri gua mu; ẹgu mini gua mu; ẹgu mee mu tekenteke; mu gbaru ọto oyi tsua mu. ²⁸A -gufukpooro iphemiphe ono; bẹ o nwekpọerupho iphe, anọduje akpọshi mu mgbenya mbọku-mbọku. Iphe ono bụ k'iphe, bukpo Chiochi kẹ Kéreshi g'ọ ha. ²⁹?Bụ onye bẹ ike bvuru; ọphu ọ dudu g'ọ bụ mbẹdua bẹ ọ bvuru ọbu? ?Bụ onye nmalahuru l'iphe-ẹji ọphu o rwuduru mu l'ẹhu?

³⁰Ọ -buru lẹ mu bafutaje aba bẹ iphe, mu e-gude aba abaa ọbu bukwa iphe, egoshi gẹ mu dū-be arwuhu. ³¹Su-a; ọ kwa Chileke, bụ Nna Nnajiuphu onoya, bụ Jizosu ono, bụ onye ajaja bụ nkiya jasụ l'ojejeje ono bẹ bụ onye maru l'iphe-a, mu epfu-a ta adudu ọphu bụ ụka. ³²Lẹ teke mu nọ lẹ Damasukosu bẹ nnajioha mkpukpu onoya, bụ iya bụ onye nọ-chiru ẹnya Aritasu, bụ eze ndu ono; woru ndu ojogu, eche nche woru dochia onu oguzo ẹka eeshije abata l'ime mkpukpu ono sụ g'e gude mu. ³³Tobudu iya bụ; e woru mu ye l'ime nkata pyoo mu l'uzo, dū l'eli igbulọ, e gude kpuphee mkpukpu onoya mgburugburu; mu shi l'ẹka onoya nahụ iya gbalaa.

Iphe, eegoshi Pọlu l'ophulenyia

12 ¹A makwaru-a l'aba aba ta abaduru l'urwu; ọle mu bafutaje aba. Nta-a bẹ mu a-wata epfu k'ophulenyia mẹ iphemiphe, bụ mu iphe ọphúú, Nnajiuphu goshiru mu. ²Ọ duru nwoke lanu, mu maru bụ onye kẹ Kéreshi, Chileke zikọtaru; o jerwua mkpopfu igwe k'eto. A nọakwaru apha iri l'eno, iphe ono meru. Ọle mu ta maedu ?o jeru ẹka onoya k'eviya; tọ ọ phuru iya l'ophulenyia? Ọo 'ẹpho Chileke nwekiya maru g'ọ nwuru. ³Onye ono bẹ mu makwaru; mẹ o jeru iya lẹ ndzụ-o; tọo lẹ maa-o; bẹ mu amaekwa; ọ kwa Chileke bẹ o doru ẹnya. ⁴E zikọtaru iya worwua ya ọkpoku Chileke gẹdegede. Ọ nọdu l'ẹka ono nımachaa iphe, kpọru onu epfufu; mbụ iphe, a suru gẹ nemadzụ te epfushi. ⁵Ọo ya bụ lẹ nwoke ono bẹ mu e-gude aba l'abaa. Ọle mu tee gudedu onwomu aba l'abaa; gbahaa lẹ mu aba abaa k'arwuhu dū mu nū. ⁶Ọme mu jeshiaru aba abaa k'onwomu mẹ mu tege abukwaru onye egomunggo swehuru; kele iphe, mu g'epfu gege aburupho ọkpobe-opfu bẹ mu g'anodu epfu. Obenu lẹ mu te ejedu aba abaa; lẹ teke mu jeshiaru aba abaa l'oo-nweru ndu a-wata arị lẹ mu kabaa shii; parụ iphe, ẹphe humaru mu l'ẹhu mẹ iphe, ẹphe numaru, mu pfuru parụ haa.

⁷Mu humakwaru iphe, dugbaa oke biribiri l'ophulenyia. Ọ buru iphe ono meru g'ọ gude a loru mkpọ dobe mu l'ẹhu; ọ nọdu akpọ mu cherere. Iphe ono buru iphe, ejeru Nsetanu ozi bẹ byaru bya etsua mu iphe gude

gọ-zeta mu gẹ mu te eje ekunuka onwomu. ⁸Iphe ono bẹ mu rwọwaru Nnajiuphu akpọ ẹto sù iya g'ọ mee g'iphe ono parù mu haa. ⁹Ọ bọru iphe, o epfujee ru mu phọ bu: “Eze-iphe-oma, mu meru ngu sùakwaru ngu; kẹle teke mu akajẹ ere ire l'ẹhu ngu bukwa teke i dọ arwudu.” Ọ n'iya-a bu lẹ mu a-nọdu aba abaa l'arwuhu dọ mu; g'ike kẹ Kéreshi ree mu ire l'ẹhu. ¹⁰Noo g'ọ gude mu sù l'arwuhu ono, dọ mu nù ono; mękpoo iphe-iphere ono, eeme mu ono; mękpoo iphe ọtsu-l'ẹhu; mę mkpamehu; mę mkpawere, aanọduje emephe mu l'opfu ẹhu Kéreshi; meru ẹhu nọdu atso mu uto. Lọ kwa teke mu dọ arwuhu bẹ ike nkiya ere mu ire l'ẹhu.

Polu agba egomunggo kẹ ndu Kọrentu

¹¹Nta-a bẹ mu meakwaru g'onye egomunggo swehuru l'eku-onwonye ono; ọ bọru unu nwuru mu ye iya. Kẹle unu gege anọdu aja mu ajaja; l'ọ tọ dọdu iphe, ndu-ishi-ozì ophuu gude ka mu; l'ẹbe adu iphe, mu bu. ¹²Mu taru nshi meshia iphe-ohumalenya, dugbaa biribiri; bya emeshikwaa-phọ iphe ozo, tufugbaru ẹhu, egoshi ike kẹ Chileke l'echilabo unu. Iphe ono bugbaaru iphe, mu gude goshi unu lẹ mu bu onye-ishi-ozì Kéreshi. ¹³?O nweru ọzo ọzo, mu kabaa eme Chiochi ọzo ree, mu emeduru unu? ?Buepho lẹ mu ta asuduru g'unu pfua mu ugwo-a? A-o; wakwa ẹka l'ali-o; eshinu ono gbẹ buwaru eji; mu mee ya unu.

¹⁴Ọwa-a kweakwa ugbo ẹto, mu jikoberu abya ndu-unu. Mu -bya; mu taa sukwa g'unu pfua mu ugwo; kẹle iphe, mu achọ abya ta abukwa okpoga unu. Ọ kwa unubedua lonwunu bẹ mu achọ. Ọ tọ bukwa unwegirima akpajẹ ẹku doberu ne lẹ nna phe; ọ chikwa ne lẹ nna agbeje akpa ẹku edoberu unwu phe. ¹⁵Mu e-gudekpoephọ okpobe ẹhu-uto mephushiaru unu iphe, mu nweru; taa ishi onwomu g'eeshi g'ọ dọru unu lẹ ree. ?Unu agbẹ yepete mu obu opfu lẹ mu kabaa unu eye obu?

¹⁶Ọ dọru ndu haru kwe lẹ mu te eshidu bọru unu ivu-erwa. Ọle ọ dọkwanuru ndu a-sù lẹ mu shi gbanuka ẹregede; lẹ mu gude ugho nmata unu. ¹⁷?Denukwanu g'ọ nwuru? ?Ọ dukpooru iphe, bu ndu ono, mu ziru g'ephe byapfuta unu ono onye ophu mu gbẹ shi l'ẹka iya ria unu urwu? ¹⁸Mu rworu Tayitosu sù iya g'ọ bya; bya asu gẹ nwanna anyi ophuu tsoru iya. ?O nweru iphe, unu a-sù lẹ Tayitosu byaru bya erita unu? ?Tọ buedupho udu umere lanu bẹ mu l'iya l'eme; tọ tọ buedupho ọzo lanu bẹ mu l'iya l'eshi?

¹⁹?Tọ unu shi e -shi teke-a rita l'iphe, anyi anọduje eme bu g'anyi e-me pfufu onwanyi l'iphu unu? Iphe, anyi anọduje epfu bẹ anyi epfujẹ maru l'anyi epfu iya l'iphu Chileke; teme l'anyi lẹ Kéreshi tugbaru bọru nanu. Ọo ya bu; ndu mu yeru obu; l'iphemiphe, anyi anọdujekpoo eme bẹ anyi anọdujekwa eme g'anyi gude metsee unu. ²⁰Mu atsukwa ebvu sù: ?mu maru tọ bukwaru nù; mu -byarwuta; unu taa dọdu gẹ mu riru l'unu a-dù; mu taa dukwapho unu g'unu riru lẹ mu a-dù. Mu atsukwa ebvu

sụ: ?mu taa byakwanụ bya ahuma l'unu anọduje aswo-phe uswo; ejiphe iji-enya; buru ndu obu oku; l'unu akpape enya; ephuphe onwunu iphu; agba nwibe unu mgbamu; ekuphe onwunu ekuku; eme mkpaka. ²¹ Mu atsukwa ebvu le mu -bya ogiya-a, be Chileke ewoda mu ali l'iphu unu; mu aguru aphu kpua ikpoto ndu mehawaru iphe-eji; ophu ephe ekwekwapho l'izimanu lwaru phe azu g'ephe haa ejo umere, rehuru erehu; haa eme ke nwanyi; haa aburu ndu iphere bvuru l'iphu.

Anma okwa ikpazu

13 ¹ Abyabya owa-a, mu abya abyabya nta-a kweakwa ugbo eto, mu abya unu agbaphe. "O kwa ekebe umadzu ebo; ozoo eto be eegu-deje bua ikpe." ² Mu nmahaakwaru unu okwa teke mu byaru k'ugbo ebo pho. Mu nodu anmakwaru iya pho unube ndu eme iphe-eji ono nta-a, mu ta anodu l'eka ono-a; me ndu ozo; le mu -bya be mu taa hakwa unu. ³ Oo ya bu; g'unu e -shi nno maru le Kereshi gude mu-a epfu opfu; l'unu sukwaru g'e goshi unu iphe, e-me g'unu maru l'o gude mu-a epfu opfu. Kereshi ono te emejekwa g'onye ike bvuru me o -nodu eme unu iphe. O chia iphe, oo-me bu l'oo-goshi g'okpehu iya habe l'eka unu no. ⁴ La makwaru-a l'ike te eshidu dukwadu iya teke a kopyaberu iya loswebe; obenu le nta-a bu ike ke Chileke be o gude nodu ndu. O kwapho g'ike te eshidu dukwadu iya ono bu g'o to shidu dukwadu anyibedua; obenu le nta-a be ike ke Chileke e-me anyi aduru ndu ge Kereshi dzu; ike adu anyi g'o du iya; k'opu ike a-du anyi l'iphe, anyi emekpo unu.

⁵ Unu nyochakwaa onwunu enyocha maru ?unu kwetakwaduru-a? Unu hukwa onwunu ama. ?Unu ta amadu le Jizosu Kereshi bu unu ebubu l'ehu? gbahaekwapho l'unu te ekwetaeduru. ⁶ Ophu mu gude eka bu l'unu e-mechaa maru l'anyibedua ta agwobeduru ekweta ono, anyi kwetaru ke Kereshi ono. ⁷ Iphe, anyi anoduje epfu anu Chileke bu g'o to kwekwa g'unu mee iphe, adudu ree. O to bukwa g'e gude goshi l'anyi mekotaru; o chikwa g'unu meje iphe, pfuru oto; o rwuhakporu o jee a-du g'o bu lekwekwe, anyi shi kwe le mbu ono be anyi ekweeduru. ⁸ Lo to dukwa g'o ka mma l'oo iphe lanu, anyi suru ememe k'emebyi okpobe-opfu ke Chileke; gbahachia l'anyi a-noduje eme iphe gude ese iswi okpobe-opfu ono. ⁹ Oo ya bu l'ehu anoduje atso anyi utso me o -buru l'anyi du arwuhu; ike dukwanu unu. Noo g'o gude o du anyi g'a su l'unu lwaru azu l'onodu, dujebe ree.

¹⁰ Mu ede iphe-a nta-a, mu l'unu ata anodu l'eka ono-a. Ge mu te eje egude ike ono gbete duru unu ehuka me mu -bya. Mbu ike ono, o yeru mu l'eka ge mu gude metsee unu emetsee ono gbetchia mee unu omeliwe.

Ekele ikpazu

¹¹ Ke ikpazu iya unwunna mu bu; unu nokwapho oma-o. Unu dujebe-kwa ree; iphe, mu arwo unu bu guche unu bukwaru nanu. Unu eburu

lẹ nchị-odoo. Gẹ Chileke ono yeru anyi obu ẹme ọ nọdu emeje g'ẹhu dọ anyi guu ono swikwaru unu eswiru-o.

¹² Unu kelekwa onyemonye ekele l'ẹhu l'ẹhu nmata phẹ akpa, dọ nsọ. ¹³ Iphe, bukpo ndu-nsọ l'ophu l'ekelekwaphọ unu.

¹⁴ Mu sọ g'eze-iphe-oma kẹ Nnajiuphu, bọ Jizọsu Kéreshi; mẹ eye obu ophu Chileke eyeje ndibe iya; mẹ ike ono, Unme-dọ-Nsọ meru g'anyi l'unu gbarọ mgba ono dzukotakwa oke l'ẹhu unu g'unu ha. Nokwa g'ọ dọ.